

四庫全書

史部

欽定四庫全書

史部
北河紀餘卷三
四

詳校官監察御史臣周元良

刑部郎中臣許兆椿覆勘

總校官進士臣朱 鈐

校對官待詔臣胡士震

謄錄監生臣吳貽棟

欽定四庫全書

北河紀餘卷三

明 謝肇淛 撰

安平鎮之北九十里其郡為東昌其縣為聊城古漯河道也其蹟曰光嶽樓曰魯連臺

東昌府春秋齊西鄙也秦置東郡漢以後分為魏郡為濟陰為清河唐為博平郡元改為東昌路國初改為府隸山東布政司領三州十五縣郡治在運河

西岸二里 唐李德裕懷東郡太守王尊詩河水昔
將決衝波溢川潯崢嶸金堤下噴薄風雷音投馬穴
未弭為魚歎方深惟公執圭璧誓與身俱沉誠信不
虛發神明豈爾臨湍流自此迴咫尺焉能侵逮我守
東郡淒然懷所欽雖非識君面自謂知君心意氣首
相合神期無古今登城見遺廟日夕空悲吟 明劉
基過東昌詩夜發高唐灣旦及東昌郭喬樹拂疎星
霜飛月將落仰觀天宇清平見原野廓白楊號悲風

蔓草杳漠漠但見荆棘叢白骨翳寒籜展季骨已朽
清風散藜藿絃歌滅遺音繭絲盡籠絡鷓鴣嘯憑
螽鳴草蟲躍遂令一變資化為跽與躄况聞太行東
水旱薦為虐饑氓與暴客表裏相倚着賑卹付羣吏
所務惟刻削征討乏良謀乃反恣剽掠坐令參苓劑
翻成毒腸藥今年秋租登行止稍有託餘波尙披猖
未敢開一喙但恐習俗成何由返初昨藩宣有重寄
胡不慎遠略往者諒難追來者猶可作歌詩附里謡

大猷希聖莫 古田張以寧過東昌詩暖日初抽宿
麥芽東風吹草綠平沙江南開遍春多少二月東昌
見杏花 莫如忠登東郡望嶽樓詩麗譙飛構倚嶙
峴面面虛無迥絕塵忽向望中低岱嶽始知行處逼
星辰傳聞馳道猶餘漢指點巖松不辨秦齊魯到今
青未了題詩誰繼杜陵人 東阿于玘舟至東昌詩
烟水蒼茫月滿樓行人春盡至齊州兩年鄉國牽長
夢千里鶯花笑短舟孤劍歸來無舊業空山相對有

同遊關河五月還須涉毒熱應知塵滿頭 聊城傳

光宅登郡城東樓詩滄海孤城接素秋萬山搖落此
登樓青徐近遠秦封在江漢遙通汶水流舊雨東南
頻入夢浮雲西北迴生愁魯連箭去人千古尊底斜

陽照白頭 麻城周弘禴登東郡城樓詩樓頭風定
落花踈楚客扁舟去釣魚烽火江關征戰少聊城莫
射魯連書 謝肇淛郡城懷古詩二首魯連多意氣

一矢下堅城千載雄圖盡河流日夜聲 關樹無春

色荒城起戰雲城東諸父老能說盛將軍 又過東
郡詩二首長堤十里水悠悠旌節猶迎舊細侯最是
隄頭楊柳色向人憔悴不勝秋 十年蹤跡半沉浮
腸斷城南望嶽樓烟火萬家河遠郭却疑此地是并
州

聊城東昌附郭邑也春秋齊聊攝之地至秦始皇置聊
城縣歷代因之但所隸不同元屬東昌路國朝改路
為府而縣屬焉明北地李夢陽聊城歌送顧明府

聊城纍纍枕桑野使君懷古聊城下龍蛟慘淡七雄
鬪當時誰是排紛者海東隱淪難見面平原不見安
平見已聞笑却邯鄲軍遺書飛燕將箭平生急難
輕列侯功成豈必千金酬只今往蹟浮雲盡遙矚滄
溟日夜流莫如忠過聊城詩濟北爭雄地遺墟尚可
疑秋風鳴劍戟野哭想瘡痍一矢論功日孤城委命
時獨憐天下士憤世意何為方豪憇李海務空衙
詩人間無不可此地况臨流疎柳描窻紙新魚上釣

鈎夢回沙月午門掩徑蘿秋誰曰居夷陋堪忘寓惠
愁

潞河在城東七里俗呼湄河黃河之支流也按水經
云源自頓丘出東武陽縣經博平至州境又東北流
入海穆天子傳天子自五鹿東征釣於潞水卽其地
也明郡人王子魯詩吾聞東郡古潞源千年故跡
成桑田白雲飛來蘆捲雪黃葉亂下鳴殘蟬清風颯
颯林篩響鴈行遠送來天邊幾番登眺發長恨綿駒

舊曲無人傳

光獄樓在府城中央創始莫考臺高廣數丈為樓四
層盤互玲瓏矗立雲表雄勝甲於齊魯萬厯間知府
莫與齊重脩 明四明屠隆詩高閣崔嵬切太虛大
荒東去獨踟躕憑陵白日雕窻合陡插中天繡柱孤
萬里風塵連海岱千家烟火接淮徐間呼濁酒供長
嘯一帶微茫見舳艫 傅光宅詩畫棟雕甍倚太清
平臨岱岳俯東瀛天低遠樹浮烟迥水遠孤城落日

明座引長風銷暑氣野含時雨近秋城傳聞海外風
波急一劍同懷報主情 謝肇淛春霽登光嶽樓詩
殘雪初消綠水波客愁無賴且高歌春回郡郭晴烟
滿天近長安王氣多海上霞光連秦岱雲邊樹色遶
漳河故園兄弟空相憶芳草萋萋柰爾何 又重登
光嶽樓詩飛閣層層接絳辰憑虛下界總黃塵帆
檣遠水遙連楚雲樹斜陽半入秦衆壑陰晴生海岱
萬家烟火傍城闌可憐信美非五土腸斷天涯久逐

臣

魯連臺在城西北十五里古聊城地高七十尺魯仲
連射書遺燕將卽此 陳徐伯陽詠魯仲連詩魯連
有高趣意氣本相求笑罷秦軍却書成燕將愁聊棄
南金賞方從滄海遊寄言人世客非君能見畱 唐
李白詩齊有個儻士魯連特高妙明月出海岱一朝
開光耀却秦振英聲後世仰末照意輕千金贈顧向
平原笑吾亦澹蕩人拂衣可同調 明謝肇淛魯連

臺懷古詩卽墨城中火牛出七十齊城一夜復大冠
如算卷甲來殘兵半壁吞聲哭先生慷慨吐奇謀一
矢射天天為愁壯士泣血甘刎頸排難解紛何所求
功成脫屣杳然去海上浮桴幾烟霧霸業雄圖安在
哉空餘昔日射書處日落城西古壘荒高臺野樹自
蒼蒼只今臺畔多秋草猶帶當年戰血黃 又齊中
雜詩西郊一坏土傳是魯連臺遺鏃莓苔冷孤城烟
霧開冥鴻高士意躍馬霸圖灰蘋藻年年薦松風夜

鶴哀

聊城而北厯堂邑博平清平三邑之境達于臨清州館陶縣其水為汶為漳為衛具泉為靈為漱玉其蹟為鰲頭磯為琉璃井為耿貴人墓為駙馬渡為黃花臺

堂邑漢發干樂平二縣地也隋開皇初始改今名石晉改為清河尋復舊元屬東昌國朝因之縣治在運河西南三十里 元縣令張養浩題縣治四知堂詩
邑壯憐才弱官微慮患深韋弦千古意冰檠一人心

袖有歸來賦囊無暮夜金三年何所得憔悴雪盈簪
博平周時為齊博陵邑漢置今縣後析置靈縣唐
析置靈泉縣尋廢元屬東昌國朝因之縣治在漕河
東岸四十里

清平齊貝丘地左傳襄公田于貝丘卽此漢置貝丘
縣隋改今名屬清河郡宋金屬大名府元屬德州國
朝改屬東昌府縣治在漕河東岸二十里

臨清戰國趙東鄙也漢為清淵縣屬魏郡晉後趙改

置臨清後析為清泉沙丘永濟宋屬大名府元屬濮
州國初屬東昌府弘治初始升為州領館陶陶丘二
縣州治在汶河之北衛河之東二水至此合而北流

明鼎大年泊清源詩渡口人家半掩扉隔林烟火
望中微急呼斗酒勞火伴逆旅主人猶未歸 薛瑄

臨清曲臨清人家枕闌河臨清賈客何其多停舟落
落無可語呼酒只對長年歌 江陰沈翰卿過清源

詩二首摸面遊絲羈抱開彩雲垂幔鳥啾啾舟車繞

郭稱都會鶯燕穿花過別街幕下材官轆轤劍月中
遊女鳳凰釵朱纓錦席淹留處苦憶揚州夢與偕淹
迤遲星橋雀舫迴欲凌倒景上層臺雞鳴萬井烟光
合雉堞重城日暈開楊柳樓深吹玉笛蒲桃酒滿泛
金杯無端約伴尋芳草康樂祠前步紫苔長洲皇
甫游臨清新城行君不見清源都會天下無昨來築
城西備胡長河十里萬艘集乃知保障為良圖戈船
隱隱橫川流蒸霞照曜雙飛樓華京鼎峙爭雄長氣

歷百二當中州言徂于齊泊河汜左右帆檣閱崇雉
甲第紛紛亂入雲紅波綠樹歌鐘起我皇垂衣二十
載玉帛羣方協文禮邊頭晏和稍失備晉代之間近
多壘金湯委輸軫長顧我我此城遂輝峙更聞安石
下東山馬得有馬飲江水 于玘臨清詩兩岸歌鐘
十里樓江聲帆影月明秋今宵始作離家夢人在漳
河一葉舟 謝肇淛清源行清源城中多大賈舟車
相載紛如雨一夜東風吹血腥高牙列戟成焦土虎

視眈眈何所求飛霜六月天含愁匹夫首難膏鼎俎
癭瘤割裂病微瘳只今毒燄猶未破依舊豺狼當道
卧萬姓眉顰不敢言但恨時無王朝佐

館陶春秋晉冠氏邑後屬趙西北有陶丘焉置館其
側因名館陶隋為毛州唐改永濟尋復置館陶縣宋
屬大名府元屬濮州國朝改屬臨清縣治在衛河東
岸二里 宋王安石發館陶詩促轡數殘更似聞雞
一鳴春風馬上夢沙路月中行笳鼓遠多思衣裘寒

始輕稍知田父穩燈火閉柴荆
元許有壬次館陶

詩浦雲林霧鬱蒼蒼水面無風晚自涼
今夜蓬窻應

不寐計程三百是吾鄉
明安福劉球過館陶詩霄

漢度鴻毛行舟及館陶路通西蜀遠浪捲北風高
郡

邑稀村舍田疇半野蒿民淳皆變魯
跋涉敢辭勞

汶水自南旺分水北流至此流漸微細
沿途置閘出

臨清之南板閘始與衛河合而北流漕舟過
此謂之

出口無復閘矣
明閩中袁表竹枝詞三春不雨閘

河乾內使樓船盡日歡四十水門都鎖却書生不敢
舉頭看

漳水源出山西一出長子縣曰濁漳一出樂平縣曰
清漳俱東經河南臨漳縣分流至館陶縣與衛水合
北流入漕至萬厯初北徙入曲周之釜陽河

衛水源出輝縣百門泉東北逕館陶至臨清與汶水
合北流至天津入海隋時疏為永濟渠亦名御河

宋王安石次御河寄諸友詩客路花時祇攬心行逢

御水半晴陰背城野色雲邊盡隔屋春聲樹外深香
草已堪回步履午風聊復散衣襟憶君載酒相追處
紅萼青跗定滿林 又永濟道中寄諸舅弟詩燈火

匆匆出館陶回看永濟日初高已聞空舍烏烏樂更
覺荒陂人馬勞客路光陰真棄置春風邊塞祗蕭騷
辛夷花下烏塘尾握手何時叙汝曹 蘇軾自河北

放舟歸江南寄楊南宮詩曉來銅雀東風起春水凌
亂漳河水郎官驚起解歸舟一日風帆可千里侵晨

鼓柁發臨清薄暮乘流下濟寧
南宮先生先我去花時想達瓜州步尋君
何處典春衫杏花烟雨大江南北
劉豫登蘇門山百泉詩太行雄偉赤霄逼
枝分蘇門為肘腋孕竒產秀氣蟠鬱涌作琉璃千頃碧
初疑驪龍蟄山趾仰噴明珠飛的皜忽如湘靈理新粧
大鑑開匣乍磨拭峰巒倒影浸雲烟蘋藻照沙改顏色
相輝一段佳風月餘澤幾州反動植昔聞隱淪有
仙人高標清與溪山敵悠悠往事散浮雲嘯有遺屋

行有跡我居東秦濟水南無限泉池日親炙一行作
吏別經年情思塵埃何處滌雲祠因禱來憑欄頓興
骨毛快胸臆飄飄蘭舟七八客尊俎笙簫隨分入勝
槩紛并接不暇恨乏魯戈延晷刻歸來簿領厭沉迷
春睡每着蝶夢適心約他時杖履遊醉漱溪流枕溪
石周百祿百門泉詩光搖暗日動珠盤汎汎輕風
漾碧瀾俯檻恍然驚醉眼雲天却向鏡中看 王鑑
百門泉詩濟南七十二名泉散在坡陀百里川未似

共城祠下水千窠送出畫欄前 明李夢陽遊百泉

詩束髮懷幽竒覽籍薰有過來登百門泉果協佳勝

趣恣恣圓波涌藹藹浮陽聚止坎停泓冽激石迅湍

注昔聞滄浪濯今解川上喻豈惟傷衛歌兼以發蒙

慮况值春序中羣物已改故張蒲冒清深鱗介各有

慕行羨浴渚鳧靜對樓雲鷺巖霏空潭影林藹變

朝暮極目北上帆朝宗感游寓 祥符李瀛共城雜

歌共城西北蘇門山烟霞滿目白日間春風杖藜恣

幽賞暫依泉澗聆潺湲君不見孫登嘯臺幾千尺巉
巖上有仙人跡天空不聞鸞鳳音石壁孤雲為誰白
錫山秦金再至百泉書院詩我懷百泉勝再作蘇
門觀巖谷阻且深泉流亦潺湲天風灑林樾五月溪
堂寒維時息塵鞅於焉且盤桓攤書坐日夕造化探
無端林茂衆鳥歸鳴聲似交歡撫景有真樂頗覺吾
心安捫蘿復登臺巖澗尋考槃劃然此長嘯世路
空漫漫 鄭善夫衛河集別詩去國心仍苦風塵病

未休六飛淹歲月八極想遨遊水動魚龍夕雲盤鸛
鶚秋江山回紫氣沙塞度青牛祗有簪萍戀聊為文
字留遐心渺無盡應與衛何流 王世貞衛河詩八
首擊汰蕩金波流光起千鬢仰看雲間質如鉤帶殘
堞 河流曲曲轉十里還相喚那比下江船揚帆忽
不見 前望渡口驛行行轉相隔非闕驛路移應是
儂心迫 十五誰家女紅粧嬌自多低頭浣衣坐不
解聽吳歌 款乃櫓聲低來船座自移無須苦相羨

各有去來時 人家半侵河屋後曬漁網夜深喚小
婦篝燈聽波響 青青河畔柳蕭索半無枝為是輕
攀折非關贈別離 人云風波惡風波信自惡生長
在家鄉那能容華落

靈泉在博平縣之莎堤漕河之傍一名涵管洞巨石
甃成六管三竅以泄暴水唐因之置縣未樂初疏會
通河遂塞

漱玉泉在臨清州城內西南隅兵備副使陳璧鑿構

亭其上四明楊守陟錢唐李旻俱有記

鰲頭磯在臨清州延亘二十餘里汶衛合流而洲峙
其中自勝國來名曰中洲環砌以石如鰲頭突兀四
閘分建而廣濟橋尾其後四方商賈財貨輻湊於此
其上有觀音閣俗呼觀音嘴 明儲瓘詩十年三往
復此地忽重經塵土長安轄烟波汶水舫平川涵夕
景遠樹隱春星魯酒偏難醉從人笑獨醒 李東
陽詩二首十里人家兩岸分層樓高棟入青雲官船

賈舶紛紛過擊鼓鳴鑼處處聞
圻岸驚流此地回

濤聲日夜響春雷城中烟火千家集江上帆檣萬斛來
琉璃瑤井在臨清州城外西南隅古湮泉也甃以琉璃
莫知年代景泰間平江伯陳豫築城掘得之名為

清泉 明周叙詩閱兵餘暇喜畱情千載靈泉舊有

名地脉重疏興勝跡井亭新構映高城源頭活水流
難竭鏡裏秋光畫不成最是元戎堪賞處琉璃澄澈

玉壺清 魏驥清泉詩井飭琉璃舊有情元戎疏後

永垂名影吞明月深通海光妬晴虹涌近城面面石
欄新琢就層層碧甃古穿成須知濟世為甘澤未許
塵纓此濯清

耿貴人墓在衛河西岸十五里有大塚舊有甘陵東
漢安帝母葬處也其下有池俗名蓮花池 明州人

管昌詩甘池高塚御河濱故老相傳耿貴人千載淑
魂應有意芙蓉開處見前身 大冶向日紅詩蕭

瑟西風草木黃貴人曾此瘞羅裳只今花貌芙蓉出

猶帶宮娃一段香

駙馬渡在館陶縣西南二十里明帝封公主於此築臺遺址尚存

由臨清渡口歷清河東鄙而北其縣為夏津為武城迤北為故城恩縣之境為德州其蹟為絲堤為甲馬營為白馬營為四女樹為陳公堤為董子讀書臺為廣川樓渡口在臨清州北七十里其地為臨清清河夏津之交有驛 明吳寬渡口阻風詩黃沙障天天半昏砲

頭風急萬家奔何人去塞土囊口天與河流一色渾
曠野麥苗纔尺許只見風來不見雨雨師風伯不相
能彼蒼高高奈何汝

清河齊貝丘地漢為甘陵晉始置清河縣歷代因之
宋屬恩州元屬大名府國朝洪武六年改屬廣平府
縣治在運河西岸三十里

夏津春秋為齊晉會盟之要津漢為鄆縣至隋始置
夏津屬貝州唐屬清河郡宋金屬大名府元屬高唐

州國朝因之縣治在運河東岸四十里 明謝肇淛
郟城春日詩東風開遍白楊柯寂寂空庭任雀羅鄉
夢每從江上去春光都在客中過城臨古渡逢人少
門閉殘燈聽鴈多一榻孤琴數行泪相思愁問夜如
何

武城戰國時為趙平原君封邑漢為東武城屬清河
郡唐屬貝州宋屬恩州元屬高唐州國朝因之縣治
在漕河東岸一里 明南康吳與弼泊舟武城詩長

年揆柁棹謳停淡月疎星泊武城若使九原人可作
絃歌聲裏拜先生 錫山王問泊武城縣詩一自髫

年為祿仕掛帆常向魯門行孤城日出人烟少遠戍
秋深首藉平土燕避風藏細柳水鳥銜食上危旌臨
河悵望絃歌里極目蕭條萬古情 李東陽武城懷

古詩野堠東連魯荒城北帶河遠山藏雨暗老樹得
春多古邑今如此貧民柰爾何使舟停衛許想像古
絃歌 王謳詩二首古縣名空在荒城草自多祗應

餘父老不復有絃歌曠野迷陵谷斜陽隱薜蘿乾坤
殊變幻惆悵獨來過 昔日絃歌地經行不復春城
隍剝古木徑路入荒榛誰念客遊子空悲泉下人停
舟四顧望迸泪一沾巾 于慎行詩停橈齊趙路河

上見孤城故國佳公子高臺亦已傾川光孤嶼斂暝
色片雲生嗚咽清漳水千秋恨未平

東郡武城乃平原君舊邑世謂

言游所
宰誤也

故城古祿縣膏池地也隋為厯亭縣屬清河郡唐貞

元五年置今縣屬甘陵郡宋屬貝州金元廢為鎮後
復置縣國朝因之隸景州縣治在運河西岸二里

明河間程信過故城詩故城界出兩河間七十灣過
又二灣回首風濤隨處是何時得許卧東山 閩中

許天錫過故城懷孫吏部詩已過煩囂地晨興自懶
梳忘傳遞中信貪了讀殘書雪甕看浮蟻風簾見
買魚美人在何處時復夢蘧蘧 李東陽過故城會

戴侍郎珍詩逆流衝長風岸渚成百折舟中落日暝

篙櫓力已竭同袍烏臺彥待我心切切飄颻康莊步
回首為跛鱉結交重恩義此道已久絕偶逢賢太守
論舊語不輟繡衣冰霜姿官好不自熟周旋共觴酌
燕坐齒為列相顧同起居停杯聽予說自從離京邑
道路屢危艱歌帆怯撐駕長纜阻牽掣復聞南河水
淤淺不過輟黃沙捲驚濤千里地欲裂雨師一何頑
風伯無乃褻我舟未妨遲農事長若缺懷著問蒼天
心亂不可揅二公濟世者慷慨憂不歇方將奉明威

庶用掃氛孽峩峩南州蓋矯矯中臺節許國同肝
腸匡時仗豪傑閒官愧升斗茲計予所拙且復盡君
觴倉卒慰離別 邑人馬偉咏衛河詩雪消春水綠
生波掩映風檣向晚多擊楫豈無人自誓扣舷應有
客相歌依依帶柳隨流去渺渺衝烟隔樹過我亦有
懷山水趣朝簪未解柰渠何 邑人周世選觀河水
漲溢詩茫茫烟水浪花新村北村南不見人遠寺依
稀三島岸平疇渺漠五湖津田家坐苦秋場廢園守

空嗟露井湮眼底淒涼無限事西風回首自沾巾
于慎行故城夜泊詩長堤高柳暮雲平入夜扁舟堰
口橫千里烟波通海戍三家村落雜齊聲殘燈微照
孤帆動短笛寒吹片月明客枕清冷渾不寐滄洲一
望颯然驚

恩縣春秋為齊里丘漢置清河郡唐改貝州宋慶厯
中王則作亂討平之宥其餘黨改為恩州金屬大名
府元屬東平路國朝降為縣屬高唐州縣治在運河

東南五十里 宋王安石貝州逢北使詩朱顏使者
錦貂裘笑語春風入貝州欲報東都近消息傳聲車
馬少淹留行人盡道還家樂騎士能吹出塞愁回首
此時空慕羨驚塵一段向南流 明王世貞恩縣道

中詩東風數杯酒細雨三家村行旅片時濕農家素
業存梨花時一暝水鸛忽羣喧大有江南色翻然憶
故園

德州周齊地也漢為平原郡至隋始置德州屬平原

郡治唐以後皆因之國朝屬濟南府領德平平原二
縣州治在漕河東岸傍 明程敏政德州道中詩出
逢漕舟來入逢漕舟去聯檣密於指我舫無着處沿
流或相妨百詬亦難禦有如暴客至中夜失所據又
如操江師擊榜散還聚摧篙與折纜往往繫愁慮平
生凡幾出苦口戒徒御忍後莫爭先寧緩勿求遽今
茲畏簡書刻日覲當宁而况河防嚴衣冠重相懼危
坐鬱成晚少寢驚達曙蕭蕭傍水村隱隱隔城樹緬

懷古賢哲高卧得深趣愧此行路難推蓬得長句

山陰周祚德州詩落日仙帆麗微風綺席清黃沙衛
河水青野德州城一失平原國雙開細柳營將軍盡
日暇千里偃高旌 四明張時徹德州館中詩踈鐘
迢遞落寒扉獨上高臺望紫微碧海靡燕人共遠青
林霜露鴈初飛自憐白日移玄鬢無那緇塵染素衣
夜半滄洲塵夢醒故園松菊待予歸

蘇堤在故城縣西南三十里延袤千里自順德廣宗

界來相傳絲治水時築也 宋司馬光詩東郡絲堤

古向來烟火疎提封百里遠生齒萬家餘賢守車纒
下疲人意已紆行聞歌五袴京廩滿郊墟

甲馬營在武城縣東北三十里與宋太祖所生地同
名有驛

白馬營在恩縣西十五里相傳唐時故鎮

四女樹在恩縣西北五十里漕河之傍地名安樂鎮
有古槐一株相傳云有四女不嫁同植此樹

陳公堤在德州東南五里歷恩縣抵東昌東北抵海
宋時河決濬縣陳堯佐守滑州築此以障水患百姓
賴之名曰陳公堤

董子讀書臺在德州國朝正統六年知州韋景元因
脩學掘地得石碣刻曰董子讀書臺弘治間建祠其
上 明分宜嚴嵩詩董子讀書處寂寂臨高臺門
墻窺孔室編簡拾秦灰業守三餘積宮存一畝開墨
池春草遍園木晚禽來獨有賢良策人稱王佐才

廣川樓在德州祠董仲舒 明廬陵陳鳳梧詩萬里
風帆溯晚秋凌雲更上廣川樓天空落木千山遠滌
盡寒潭一鏡浮西漢文章懷往哲東藩冠蓋記同遊
雙梧亭下一尊酒素月流光入賞眸

北河紀餘卷三

欽定四庫全書

北河紀餘卷四

明 謝肇淛 撰

由德州而北歷吳橋景州之境達於東光歷交河南皮之境達於滄州其蹟為古隄為弓高城為胡蘇臺為泊頭鎮為郎兒口為會盟臺為清風樓為毛公井為鐵獅子其河之故道為馬頰為胡蘇為簡為潔為鈎盤為太史為覆釜為徒駭

吳橋春秋晉地至宋為將陵縣後改長河縣永靜軍
金改今名屬景州元屬河間路後陞為陵縣國朝仍
降為縣屬河間府之景州縣治在運河東岸二十里

明錢唐瞿佑泊吳橋連窩驛詩官船來往泊官河
鳳有鳥梧鵲有柯久客羈棲嫌寂寞喜聞水驛是連
窩 沈愷吳橋夜泊詩二月下神京春風催客程草
生汶水渡花發魯王城不向山中去翻為湖上行悠
悠戀行役何處可逃名 鼎大年夜泊連窩大風詩

二首北風吹雨暗長河今夜連兒十里窩憔悴江南
遊宦客黃塵滿面奈愁何 河邊白鳥蹴飛花河上

垂楊是酒家馬上行人莫回首異鄉終日苦風沙

王世貞吳橋道中詩三輔行將遍孤城客久稀朔風
深引慢寒日淡沾衣何物人堪老浮名計總違黃塵
滿天地不點北山薇

景州春秋為晉條地漢為菑市後為廣川縣至唐武
德四年始置景州宋為永靜軍又曰崇寧金元仍為

景州國朝因之屬河間府領吳橋東光故城三縣州
治在運河西岸二十里 明程敏政夜泊景州安陵
河詩我行滄景路渺渺夜過亥東風何太顛勢欲簸
鯨海盤渦如弈旋駭浪若山嵬崩騰沙口決斬剝崖
形改官舟浮一匏出沒漸危殆牽夫屢前卻舟子失
精采無乃蛟龍怒或恐鼉鼉餒合力眠高桅擇地艤
而待家人走傍皇船頭設俎醢相呼酌馮夷亦欲訴
真宰狂飈俄爾帖愁雲散其靄張帆下中流擊楫歌

歎乃起坐推雙蓬喜氣人百倍向來得失心悠悠竟
何在 劉基發景州詩淡淡夕風作蕭蕭蘆葉鳴林
間衆鳥息河上一舟行海近雲常濕天虛月更清神
京看漸近且緩望鄉情 楊士奇晚次景州詩下馬
郭西村蕭條盡掩門荒城明落景獨步出平原野水
條侯墓寒蕪董氏園間因訪遺事邂逅故人論 鄭
善夫安陵阻風詩落日安陵上荒蕪望薊丘風沙無
晝夜家室此淹留江漢悲多故干戈賦遠遊河清是

何日吾志欲東周 倪敬過安陵詩南望吳山百感
生東風吹棹過安陵青春誰為更寒服白髮渠同話
夜燈貧去江湖長作伴年來親友冷如冰還鄉暫脫
風塵吏不負花間酒似澗 于慎行安陵雨泊詩廣
川城北倚扁舟寒色蕭蕭對驛樓過雨菰蘆驚午夢
乘波鳧鷖激中流長天積水千帆暮斜日疎林五月
秋指點津亭問前路居人為說古瀛洲

東光漢渤海郡弓高縣地隋置觀州唐武德四年析

置東光縣隸滄州宋改渤海縣元仍今名國初省入
阜城後復置屬景州縣治在運河東岸三里 明錫
山王瑛東光夜泛詩暝樹高寒雲不生長河新纜覺
舟輕津鳧隊隊如相識飛上霜堤伴客行

交河漢中水縣治也金大定七年置今縣屬獻州以
滹沱高河二水交流故名元仍之國朝改屬河間府
縣治在漕河西岸五十里 唐胡曾詩交河水薄日
遲遲漢將思家感別離塞北草生蘇武泣隴西雲起

李陵悲曉侵雉堞烏先覺春入關山鴈獨知何處疲
兵心最苦夕陽樓上笛聲時 明謝肇淛交河遇風
詩細柳如絲踏作塵乾坤近塞本無春交河日暗黃
雲起風急沙飛不見人

南皮春秋燕齊二國之交齊桓公北伐至此繕脩皮
革名古皮城後以章武有北皮亭故曰南皮以別之
秦始置縣歷漢晉俱屬渤海郡唐宋屬滄州元屬河
間府國朝屬河間府之滄州縣治在漕河東岸十八

里

滄州古渤海地海水盤洄曰渤以其在海曲故名漢
置浮陽縣拓跋魏始置滄州隋以後仍之但所隸不
一宋屬橫海軍元屬河間國朝因之領南皮鹽山
慶雲三縣州治在蘆鎮運河東岸 唐李白送趙

少府赴長蘆詩我去揚州市送客迴輕舸因誇吳
太子便觀廣陵濤仙樹趙家玉英風凌四豪維舟至
長蘆目送烟雲高搖扇對酒樓持袂把蟹螯前途倘

相思登岳一長謡 僧無可送呂郎中赴滄州詩出
守滄州去西風送旆旌路遥經幾郡地盡到孤城拜
廟千山綠登樓遍海清河人共東望日向積濤生

宋黃庭堅發白沙口次長蘆詩篙師救首尾我為制
中權挂席滿風力如摧彊弩絃曉放白沙口長蘆見
炊烟一葉託秋雨滄海百尺船反觀世風波誰能保
長年念昔聲利區與世閱周旋大道甚閒暇百物不
廢捐誰知目力淨改觀舊山川 又阻風入長蘆詩

福公開百室不借鄰國權法筵森佛像天樂下管絃
我來雨花地依舊薰爐烟金碧動江水鐘聲到客船
茗椀洗昏垢經行數阻年歲寒風落木故鄉喜言旋
林回負赤子白璧乃可捐侍親如履冰風雨速暗川

元吳萊滄州詩荒亭沽酒壯心違目極東南霧雨
微百里齊封滄海接千年禹跡濁河稀暗塵掉馬呈
金轡衰草看羊着錦衣猶記上元鳴鼓夜蒲船燈火
越歌歸 薩天錫宿長蘆詩柳花漠漠春歸寺柳色

青青晚渡江屋角松聲撼風雨道人一夜不開窓

王懋德長蘆遇順風詩水聲怒激春雷響帆影輕隨

遠鴈飛東望水雲三百里沙鷗待我釣魚磯 明瞿

佑滄州城詩滄州城城何高城上樓櫓城下壕龍跳

虎躑怒咆嗥陣雲紛起戰塵塵落日無光照白旄只

今偃武弓矢橐但見運河遶郭流滔滔高桅大柁長

短篙自南餉北連千艘漕夫叫號挽卒勞朔風刮面

穿征袍我倚船窓望遠臯手掬清光照鬢毛朗誦招

魂歌楚騷憂心為汝徒怵怵 又長蘆詩接棟連甍

屋宇重喧然雞犬認年豐時當鳳歷三秋後人在鯨
川八景中萬竈青烟皆煮海一川白浪獨乘風遙瞻
寶塔凌霄漢知是前途有梵宮 滑臺宋訥舟過長

蘆詩列肆亭臺土已崩舊時和氣冷如水城池人物
分今昔市井繁華問廢興斷壁野花迎客棹壞橋津
柳曬漁舂誰知兵後商人少歲課猶隨國用增 楊

翥長蘆道中詩秋色兼旬暑未捐蓼花開遍亂鳴蟬

兒童嬉戲清陰裏
屋室鱗鱗傍水邊
薛瑄滄州北

舟中詩澶漫滄州北
舟行逆水遲
連林秋柳瘦
接翅
曉鴉稀
原野波溝減
人家生理微
端居對明燭
深念
莫相違
于玘滄州詩
九月一日
渤海郡涼風
落葉
何紛紛
孤舟伏枕逢
秋色
長路停尊對
暮雲
寒鴈亂
迷龔遂廟
清江曲
抱獻王墳
古今蹤跡
堪惆悵
獨立
滄波倚夕曛
徐中行長蘆官署詩
蕭齋無事日
垂簾飄泊
何知吏隱
兼猶憶
主恩
分虎竹
敢辭官跡

混漁鹽南皮詞客堪誰向北海青尊只自拈舊社五
湖秋正好未歸空復羨陶潛 四明張琦長蘆晚發
詩扁舟病起試滄浪猿臂篙師水技長日照醴泥通
海白風吹江氣入雲黃漁樵亂屋依深柳鵝鸛清流
叫夕陽迢遞青徐行入眼天涯終恐是他鄉

古堤在吳橋縣城南古黃河隄也西南接德州界東
北入寧津界歲久河涸隄址猶存 元薩天錫過吳
橋古隄詩迢迢古河隄隱隱若城勢古來黃河流而

今作耕地都邑變通津滄海化為塵隄長燕麥秀不見
築堤人

弓高城在東光縣西南三十里漢韓頽當所封國也
其址在縣之順城鄉 明周翰詩頽當封建日漢邑
稱弓高于今荒草裏時聞風怒號亂鴉噪古堞寒雨
灑空濠遺跡宛然在黃土圍周遭

胡蘇臺在東光縣東南高二丈許圍二十餘丈以臨
胡蘇河得名

泊頭鎮在交河縣東五十里運河之傍商賈輳集南
北一大都會也河間府管河通判駐此有新橋驛俗
名泊頭驛 明瞿佑新橋夜泊詩二首浪靜風恬月
色明葦花灘上鴈知更游魚故欲驚人夢躍出船頭
水有聲 數點漁燈隔遠陂斗杓插地夜何其推篷
自覺霜威重正是烏啼月落時 倪敬夜泊泊頭驛
下水東流獨倚篷窻散客愁江上夕陽斜度鳥雨中
春樹遠迎舟一官牢落辭京國千里蕭條入霸州歸

藉圖書營舊業梨花麥飯老林丘

郎兒口在南皮縣有大堤自南亘北五十里高丈餘
東為滄州境西為南皮境衛河水漲西患特甚元泰
定以來屯軍王民爭訟不決乃公勘開掘截然中斷
二十餘里水由中流名郎兒口有碑記 明趙叔紀

詩古來漳水苦橫流南皮直瀉來滄州古人築堤障
其下南皮民命隨魚游中有志士伸敵手鼓義興工
破隄口約束狂流俾中行兩岸從茲樂農畝大患已

除民已安前人事蹟今人看豐碑兩立截文字從來
孰便興爭端因笑當年築堤日愴然狂夫與愚卒那
知曲防世所禁嫁禍移災天不恤我來披荆隄上行
摩挲石刻百感生時和今賴天子聖河不決兮民不
爭

會盟臺在長蘆一名盟亭古燕齊之界二國常會盟於
此故名

清風樓在滄州公署中相傳建於晉永康中元薩

天錫元統乙亥錄囚至滄州清風樓題詩晉代繁華
地如今有此樓暮雲連海岱明月滿滄州歸鳥如雲
過飛星拂瓦流城南秋欲盡寂莫采蓮舟

毛公井在舊滄州城東北隅唐開元間清池縣令毛
公母老苦水鹹不堪為養遂於縣舍旁穿地得泉甚
甘人謂之毛公井

鐵獅子
在舊滄州城內周世宗北征契丹駐蹕滄州
有罪人善治輸金鑄獅鎮城贖罪高一丈七尺長一

丈六尺至今存 明閩中陳全之鐵獅歌滄州云有
鐵獅子傳在舊治故城裏我特乘風一覲之分明守
護有神鬼昂頭峙足百尺餘英風猛烈射太虛勢若
騰踏上霄漢欲去不去仍踟躕幾迴弔古訪遺老言
是周家天子造表此神物威契丹氣吞幽薊烟塵掃
憶昔駐蹕蕭寺前金羈玉綫吼青烟豈知浮雲變顏
色丹雘剝落漫桑田僧去堂空幾人世碧瓦殘垣雜
明地天寒野曠啼慈烏日暮村狐走空隧如今聖代

統華夷百獸率舞鳳皇儀貌貅百萬遠山後吁嗟乎
鐵獅子英風猛烈爾奚為

馬頰河在東光縣界後呼為篤馬河唐開元中重開
號新河

胡蘇河在東光縣東三里許歷慶雲鹽山入海豐夾
河會于海漢志云以其水散若胡鬚然故名

簡河潔河皆在滄州之臨津

鈎盤河在南皮縣城北

覆釜河在南縣

徒駭河在滄州廢清池縣西五十里有隄 按程氏
九河考謂鈎盤在獻縣東南八十里餘八河皆在滄
州南皮東光慶雲之境而酈道元及宋儒程氏皆謂
九河之地已淪於海與書傳所載不同此蓋後世新
河而傳以舊名目未敢信以為真也

滄州之北其縣為興濟為青為靜海其山為中條其水
為滹沱為潞為海其鎮為天津為楊柳青為楊村其蹟

為盤古溝為神堤為鳳皇臺是為北河之北界

興濟本宋范橋鎮地大觀中置今縣金屬滄州元屬

清州國朝改屬河間府縣治在運河東岸 明東萊

黃福興濟阻風詩天風連日自南來星使扁舟適北

回簸簸篋簞頻斷續迢迢河道又縈迴燕臺有記新

思集楚館無書舊恨堆凡事從容由命裏不須妄想

不須猜 張頌詩城下西流遶衛河秋來雨急漲洪

波排空雪浪奔騰遠得水魚龍變化多兩岸人家分

野色萬株楊柳挂烟蘿漁翁不解東西路穩坐船頭
發浩歌

青縣春秋時清國也晉為清州唐置盧臺軍五代周
置乾寧軍又為永安縣宋大觀中以河清七晝夜仍
為清州金元因之國朝降為縣屬河間府縣治在運
河西岸 明瞿佑詩未飲青州酒先乘青縣風川原
通趙北境界入山東饌設河魚白筵供野棗紅連屯
禾黍熟飽飯樂年豐 李時勉青縣遇舊詩晚過小

邑整徘徊舊友相邀醉一杯高枕西風吹棹去不知
明月上船來 無錫浦瑾青縣晚發詩垂柳迷歸路
飛花引去舟疊峰山錯峙曲岸水迴流鳧鴈晴方舉
魚龍暖欲浮身隨吾道在此外復何謀

靜海本宋清州之渦口寨大觀中置靖海縣金元仍
之隸清州國朝改靖為靜屬河間府縣治在運河東
岸 元張寧泊獨流淺詩霽月中天見絳河黃流滿
地漾金波荒陂野火兼漁火短棹吳歌雜楚歌去鴈

已連家信遠閒鷗豈識客愁多江南二月花如錦獨
負歸期柰爾何 明瞿佑過靜海縣詩古縣臨河口
遺民住岸傍荒田多廢棄破屋半 亡薄薄沽來酒
低低坐處牀舟人知往事相對話偏長 曾祭過靜
海逢侯主事同宿寺中詩皇華千里客何意此相逢
水郭春光早郵亭柳色濃偶因牛渚棹來聽虎溪鐘
明發孤舟別相思隔九重 倪敬過靜海縣詩朝來
過靜海歸路有三千吟藁添詩句行囊只舊氈水禽

飛傍客河柳遠迎船注目淮南道龍峰隔楚烟 又
過獨流淺詩獨流清曉發高下亂帆檣潮入雙塘淺
風高孤樹忙荒祠烟火斷遠戍角聲長男女勤生計
葦蕭聚海商

中條山在青縣唐陽城傳城家于北平隱居滄
州中條山詔於滄州起之考滄州無此山而滄州
舊有條縣或因而名之耳其山有懸崖瀑布數十
丈如猿鶴聲 明邑人馬政詩界破城南萬頃田

猿啼鶴唳自年年拾遺幾度溪頭過猶見餘波浸碧天
滹沱河源出大鐵山自代郡鹵城東流經獻縣城南
十一里單家橋至青縣南至河口與衛河合流而北
至于天津入于海 唐李益臨滹沱見蕃使詩漠南
春色到滹沱邊柳青青塞馬多萬里江山今不閉漢
家頻許郅支和 宋黃庭堅次韻孔四著作作北行滹
沱詩駢謁蒙風霜雞聲渺墟里青燈登豆粥落月踏
水水平生不龜藥纔可衛十指指此千戶侯誰能優

方此 文天祥渡滹沱詩過了長江與大河橫流數
仞絕滹沱蕭王麥飯曾倉卒回首中原感慨多 明

金幼孜詩前驅聞警蹕傳道近滹沱凍合含初日風
微動碧波人從仙仗出路自畫橋過北望幽燕外青
山疊疊多 程敏政詩寒風挾霜起水浪從西來下
觸斷橋柱碎此千瓊瑰流響甚清麗驚波屢盤洄官
舟大如掌疾棹過南隈古來濟川人感激多良材

上黨栗應宏詩迢迢滹河水送自古并州異國風

沙遠辭鄉日夜流
鴻飛依暗浦
花發滿平疇
宛宛箕山在
誰能向此流
李攀龍詩
滹沱來不極
野色蕩孤城
擊楫中流過
褰幃下吏情
天銜紆岸轉
日上大波行
獨在知津後
風塵見濯纓
樊鵬詩
滹水寒津斷
常山古郡開
城猶宋帝閣
野卽趙王臺
關遠邊風入
川長朔氣來
蒼蒼戰場處
愁見水東迴

潞水源出幽州漢光武遣吳漢等十二將軍追賊戰于潞東卽此今青縣有流河驛北至于通州通謂之

潞河 明瞿佑流河驛詩河水滔滔不盡流今來古
往幾春秋波濤不覆漁翁艇館舍長迎使客舟青眼
有情惟岸柳白頭無悶是沙鷗從今解却塵纓去一
任滄浪孺子謳 李東陽流河驛遇謝內脩太守詩
仰止懷先達相逢卽舊知別離曾有贈舟楫本無期
細雨春燈暗高歌暮角悲從君問前路江海得吾師
黃巖謝省次韻詩舟楫愁誰語風波未自知偶逢
君共泊恰與月相期夢憶仙舟會情忘客路悲論詩

意無極一飲亦吾師 于玳夜泊流河驛詩流河灘
頭夜不寐海風江霧旅魂驚洪濤滂沱沉魚龍影野戍
荒涼豺虎聲客路此生渾未了鄉關愁緒迥難平可
憐蘿月還相照明發前洲問水程

海在靜海縣東二百里禹貢同為逆河入于海卽此
古謂之渤海以其在齊之東亦謂之東海又謂之北
海楚子語齊師君處北海洪景廬曰北至于清滄故
曰北海以其地連滄州亦謂之滄海金封王福滄海

公是也而河間謂之瀛海者以其地居水中若道家蓬萊三島然故名

天津在靜海縣北九十里其地居白河之西衛河之南二水至此合流同入於海有三衛鎮城大直沽小直沽海口魚鹽商賈百貨畢集元寧直沽詩野灤

天低水人家時兩三鴈聲連漠北魚味勝江南雪擁茅痕短寒禁柳眼緘持竿吾欲往拙宦百何堪王

懋德詩極目滄溟浸碧天蓬萊樓閣遠相連東吳轉

餉輸秬稻一夕潮來集萬船
明瞿佑過天津詩官

河通海道軍府壯京畿
赴北千艘集投南一客歸
潮聲添水勢霞彩弄晴暉
對酒留連久人情莫敢違

又次直沽詩長川波浪去漫漫
直指東南送客還
潮水四時來海上
天河一派落人間
挂帆商舶秋風順
曬網漁翁夕照閒
整倚船窓遙望處
青螺數點見前山
曾祭過直沽詩近海嚴烽戍
孤城雉堞雄河流
千里合舟楫萬方通
島嶼鯨波外樓臺蜃氣中
春來

何似景烟綠曉霞紅 又再過天津詩路河南下接
流河飛入天津漲海波獨坐船窓清夜寂月明何處
扣舷歌 黃淮直沽詩孤城近海曉光遲遙認歸程
望不迷潮水分流波上下人家相對岸東西市聲喧
雜商人集野色荒涼鴈影低猶記前年留飲處菊花
插帽賦新題 宋訥詩旅思搖搖嗜晝眠舟人報是
直沽前夕陽野飯烹魚釜秋水蒲帆賣蟹船詩有白
鷗沙上興書無青鳥海東傳老為聲利閒驅遣少讀

南華四五篇 又夜泊直沽詩海艦河帆到此分直
沽多舊遠方間十年水路風塵隔兩岸人家漁火焚
鷗鷺河邊船泊月魚蝦鄉裏飯抄雲却思昔日曾經
過紅酒青歌醉夕曛 無錫邵寶泊天津舟中觀水
詩河水東注海海流亦復東人言如沃焦畢竟誰能
窮蓬萊不可渡萬里悲天風北斗揭西柄影落清波
中耿耿欲迴瀾蕩漾涵虛空昔聞有碣石助禹成神
功我將往求之道險多蛟龍靜觀歎逝者緬懷川上

翁 程信天津詩天津橋上水雲橫紅蓼灘頭蹙駐
旌行盡人家無犬吠却從海上看潮生 王洪過直

沽詩水出漁陽郡山橫薊北天高樓瞰海日遠嶼入
江烟市集諸番船軍屯列陣田風高悲鼓角霧重失
旌旄匪獨關河壯由來節制全精兵亘雲朔勁騎出
幽燕大漠黃塵外三韓落照前將持定遠策不用繞
朝鞭 信陽何景明送杭憲副備兵天津詩天津橋
北望京樓金鼓東行節使舟日月晝懸滄海樹龍蛇

春壓九河流百年貢篚通南極萬里旌旄屬上游莫
笑談兵尊俎上書生原不為封侯程敏政天津題
劉憲副拱北樓詩危樓突兀中天起雄峙高城壓諸
壘登樓北望渺茫間正距皇都三百里直沽東去當
海門九河下瀉鯨濤奔一道科徵比州縣十里虎豹
分營屯天子端居不忘武敕遣提刑此開府眼中壯
觀忽歸然緩帶時來閱干櫓四方玉帛趨神京千車
萬舶無畱行題品休歌太行路麗譙却數天津城憶

昔文皇曾駐蹕父老相傳至今日
憲臣初下新條章
宿將誰諳舊軍律城頭大旆翻
晴虹城邊細柳搖春
風我來徙倚不能去宸居宛在紅雲中
畫角悠揚鼓
聲壯雉堞嵯峨日初上
掀髯聽講陰符篇誰道儒生
不堪將檻外滔滔河水流
酒酣擊節歌新樓盛年相
與赤心在范公敢謝蒼生憂
薛瑄早過天津詩烟
收澤國曉天晴日出扶桑萬里明
二水交流東海濶
一城雄鎮朔方清
連雲風送孤帆遠
夾岸潮隨大舶

平借問關門來往客不知誰是棄繻生 眞州蔣山
卿宿天津詩津口波濤曲抱迴孤城正逐海門開凍
埋澤窟魚龍卧霜滿關河鼓角哀一夜朔風吹地轉
五更寒月涌潮來自憐水宿平生事腸斷今宵亦屢回
村李東陽舟次直沽與謝太守詩二水斜通海孤村
合抱城夜窻明月過春浦暗潮生憂國身將遠還家
夢不驚畱歡有親舊羈旅見真情 又過天津詩玉
帛都來萬國朝梯航南去接天遙千家市遠晨分集

兩岸河平夜退潮
貢賦舊通滄海運
星辰還象洛陽橋
河山四塞襟喉地
重鎮還須擁使軺
厯下邊貢直沽城樓詩
宦遊數覽東南勝
西北乾坤見此樓
冠冕八方通驛道
河山千里控神州
風連碣石雲秋黯
日倒扶桑海夕流
老病獨懸戎馬泪
俯身疑入洞庭舟
樊深舟次天津詩
遠別長安日未曦
野花春樹兩相隨
攀鱗玉珮聞青鎖
化鶴仙臺見紫芝
晴景半含雲徑閣
驚湍曲抱海門祠
風塵驛路行應遠
回首

蒼茫動旅思 謝省直沽次韻詩喧寂初收市河流

暗入城蒲深春水長沙起晚風生隔浦漁猶唱浮波
鳥不驚孤舟老江海到處識人情 長洲皇甫汈天

津荅少玄兄詩別家五月渡江水棹拂炎雲入淮汜
行殘六月臻銜流涼飈一夕秋聲起眼中金闕已在
望手持玉杯喜相向聞道長安有狹邪明朝走馬踏
晴沙莫將潞水橋邊柳看作玄都觀裏花 武進薛

應旂過天津謝敷憲副詩海上風高遊子哀夢同沙

鶴夜飛迴孤城畫角寒聲急荒寺踈鐘曙色催麟閣
雲霄誰薦士豸冠江漢獨憐才片帆已出黃河口便
向吳門望越臺 錫山顧彥夫泊天津稍直口詩名
津稍直一舟橫野曠誰知夜幾更山月徘徊人獨立
海天寥落鴈孤鳴河流東下烟波遠風陣西來草木
驚有酒欲斟斟不得邊防民瘼正關情 華容孫宜
天津南舟行詩凌波舟楫驚風定傍海帆檣落照斜
三島樹深迴鸛鶴九河水泮壓龍蛇南來貢篚通王

服北望樓臺近帝家莫道壯遊非此日會將詞賦達
京華 隴西金鸞泊天津詩月明天際酒初酣直北
雲深海氣涵一夜潮聲來枕上夢中猶似在江南

徐中行夜泊天津與黎惟敬對酌詩張翰秋風去不
疑桂叢猶帶故人期平蕪落日千帆宿大漠天高片
月垂潮起魚龍吟北海露寒烏鵲繞南枝長安多少
衣冠地此日誰論楚客悲 于慎行天津月夜詩放
舟乘晚浪伐鼓注歸流明月千帆夜長風萬里秋篙

師探渡口津吏指潮頭浩蕩烟波裏應憐估客遊

又天津詩白浪浮空拍海門天津城下萬艘屯吹簫

伐鼓中流渡賣酒烹魚何處村黯黯平林含雨氣迷

茫遠岸吐潮痕江淮百億輸王府歲歲梯航奉至尊

鄙人潘榛天津詩極目望天津高秋徹原野蒼茫

雲霧生水色同瀟灑地勢缺東南河流日夜下滄溟

指顧中千里驚一瀉長風促急流迅速過於馬防兵

億萬多鼓角聲啞啞舳艫望如雲旌旗赫渥赭轉餉

日不給誅求及鰥寡獨抱憂世心涕泪忽盈把浮海
欲避之孤舟無從者安得樓船將為報倭平也

楊柳青在靜海縣北五十里 明瞿佑楊柳青謠昔

聞楊柳青今見楊柳黃三秋既迫暮午夜仍飛霜黃
葉辭舊枝青眼存生意稍待春陽回又看柔荑翠榮
枯互乘除氣運長相參在物尚如此在人何以堪喬
林蔽日昏古樹停雲密為作短歌行聊備樂府什

宋訥過楊柳青詩楊柳青枯異昔年人家猶有在河

邊縛蘆厚覆低低屋把竹輕撐小小船半川霜禾喧
鳥雀輕梳烟柳立鵝鶩眼前莫究興亡事萬里華夷
自一天程敏政楊柳青見桃李詩春陰淡淡綠楊
津兩岸風來不動塵一日船窻見桃李始驚身是卧
遊人子慎行楊柳青望天津海口詩夕泊大隄口
雨氣侵肌骨舟子不得停鳴槳中夜發聞道海門近
驚栗不敢越漁燈隱遙浦簫鼓聲未歇人語烟中村
舟橫沙上月岸接遠流平樹入回波没不覩潮漲奇

安知溟渤濶喔喔天雞鳴東望蒼烟裂霞生赤城嶠日
出扶桑窟朧朧五雲裏欲吐金銀闕鐘鼓羅宮廷百辟修
朝謁整衣顧我僕神情坐超忽 又揚柳青道中詩鳴
榔凌海月揆舵破江烟楊柳青垂驛蘿蕪綠刺船笛聲
邀落日席影掛長天望望滄州路從茲遂渺然 南海
盧雲龍揚青驛詩漂泊風塵悵遠遊揚青亭下暫維舟
故鄉門巷經梅雨客路山川到麥秋潦倒詩篇時自適
飄零杯酒暮堪愁幾宵尚憶長安道北斗遙瞻接鳳樓

楊村在天津城北三十里有驛 明李時勉過

楊村驛詩小驛臨河口萋萋草上堂門邊一枯井堦

下幾垂楊寂寂塵生榻喧喧鳥過墻逢迎惟驛吏

木偶被衣裳 李東陽楊村阻風詩春風蕩漾河水渾

驚沙走石天地昏舟人喧呼怒濤涌海若戰鬥羣虎

奔前船咫尺不得上去路倉皇安可論床歆几側坐

未穩乘月夜過蒲溝村 王問楊村與朱司空言懷

詩北路饒長風方舟成淹泊遲遲通路亭瀰瀰沾水

曲辛勤洲渚間委心在行役俱抱虛曠懷已志在空
谷羲和無停軌世事如轉矚長廬猶為謬而况杞人
哭嘉德為我鄰良晤行可續勿忘秉燭言皓首以自
勗 程敏政楊村驛逆風通夕詩忽忽無言裏悠悠
不寐中短檠留白蠟陰牖落青蟲人幸窺蓬月天慳
上水風白河三百里羈思浩無窮 又楊村道中詩

幾處炊烟認水村數聲山犬吠籬門寒天日落明鴉
背荒歲田空剩草墩垂澗石如牛馬飲排山雲似節

旄屯眼中無限詩情在欲對沙鷗了一尊 武進徐
問楊村大風詩仲冬天氣肅疋馬向河干林撼風聲
厲沙昏日色寒驅馳竟何意漂泊自無歡天地無情
者誰憐遊子難

盤古溝在青縣南十五里相傳盤古之墓在水中有
石棺鐵鎖繫之或隱或見溝北岸有盤古廟 明廬
陵鄒德溥詩蕭蕭遺廟夕陽天野殿崢嶸曲澗邊萬
古乾坤心上闢于今日月掌中懸有無石匣滄波隱

彷彿仙衣碧草傳我亦離形遊太始停舟問訊思道
然

神堤在興濟縣漕河堤上有柳數百株永樂間知縣
王彬以河決未及築堤民居盡沒痛不能救投水而
死屍直漂入縣堂之上人民憐之置祠祀焉名曰神
堤 明樂素老人詩河防未就竟沉淵誰識當年令
尹賢惟有春風祠下柳翠眉長為鎖寒烟

鳳皇臺在靜海縣西五里相傳有鳳皇集此遺址尙

存



北河紀餘卷四